

光緒江西通志

江西通志卷一百三十七

列傳四

南昌府四

明

曾鈞字廷和進賢人嘉靖進士授行人擢南京禮科給事中時四方銀場得不償費且爲盜窟鈞奏罷之鈞剛廉疾俗首劾罷參贊尚書劉龍已劾羽國公郭勛禮部尚書嚴嵩未幾劾工部侍郎蔣淦延綏巡撫趙錦最後劾罷操江都御史柴經直聲震一時出爲雲南副使兩司詣黔國公率廷謁鈞始正其禮且釐還所侵麗江民地遷四川參政黔寇亂撫定之屢遷河南左布政使以右副都御史總理河道徐邳等十七州縣連被水患帝憂之趣上方略鈞請濬劉伶臺至赤晏廟八十里築草

灣老黃河口增高家堰長隄繕新莊等舊牘閱數月工成進工部右侍郎治河四年入爲南京刑部右侍郎久之乞歸家居十餘年卒贈刑部尚書諡恭肅

明史

李逢字邦吉豐城人獻之曾孫嘉靖進士授紹興府推官有廉明舉擢兵科給事中大同叛卒據城逆命言者以用兵激變歸罪總督劉源清下獄逢上疏申救源清乃得免轉戶科有旨幸承天偕同列伏闕諫逮繫謫永福典史終知德安府爲政以正綱紀重風化爲先黷吏黠民持法不少假視身清肅境內凜然卒祀名宦

人物志

謹案逢爲襄敏之兄明史作弟

李遂字邦良豐城人嘉靖進士授行人歷刑部郎中錦衣衛送盜十三人遂惟抵一人罪餘皆辨釋調禮部忤

尙書夏言因事劾之下詔獄謫湖州同知遷衢州知府
擢蘇松兵備副使遷廣東按察使釋囚八百餘人進山
東右布政使江洋多盜以右僉都御史提督操江倭擾
江北廷議請特設巡撫遂以故官撫鳳陽四府時淮揚
三中倭歲復大水遂請餉增兵恤民節用次第畫戰守
計三十八年四月倭數百艘寇海門遂語諸將曰賊趨
如皋其眾必合合則侵犯之路有三由泰州偏天長鳳
泗陵寢驚矣由黃橋偏瓜儀以搖南都運道梗矣若從
富安沿海東至廟灣則絕地也乃命副使劉景韶遊擊
邱陞扼如皋而身馳泰州當其衝賊知如皋有備將犯
泰州遂急檄景韶陞遏賊連戰丁偃海安通州皆捷賊
沿海東掠遂喜曰賊無能爲矣令景韶陞尾之而致賊

於廟灣賊據險不出攻之月餘不克遂令景韶塞塹夷木壓壘陳火焚其舟賊乘夜雨潛遁江北倭悉平璽書獎勵賊駐崇明三沙者將犯揚州景韶戰連勝圍之劉莊會劉白志顯來援遂檄諸軍盡屬顯攻破其巢追奔白駒場賊盡殄時遂已遷南京兵部侍郎論功予一子世干戶莅南京甫數月振武營軍變振武營者尙書張整募健兒以禦倭者也素驕悍以給餉踰期鼓譟戕督儲侍郎黃懋官許犒十萬金乃稍定遂託病閉閣給免死券以慰安之而密諭營將掩捕首惡二十五人繫獄止誅叛卒三人餘戍邊衛未幾擢南京參贊尙書奏調鎮武軍護陵寢一日散千人留都自是無患越四年以老致仕卒贈太子太保諡襄敏

明史 白志 舊案 尹嘉 撰李遂墓志與此小異

遂父萬平字惟衡
諸生見羅洪先集

劉良弼字賁卿南昌人嘉靖進士授金壇知縣擢御史
正色敢言不少阿附時巨璫馮保弄政首疏參劾謂其
罪浮於劉瑾未幾而保敗巡按八閩畿輔凡所建白不
屑細瑣上防邊六漸略數十萬言皆長算用忤相淹卿
寺久之乃遷巡撫西粵尋卒

人物志

萬虞愷字懋卿南昌人嘉靖進士授無錫知縣治尚寬
大擢南京兵科給事中數與守備內臣露章爭事謂營
兵不當充私役又謂操江都御史故常與守備參贊列
坐而後爲權璫所抑設次西向非是及奏革宣成以來
冒功升襲者若干人厯山西左布政使累晉南京都察
院右副都御史總督漕儲除京商和買之困又上便宜

六事軍民頌德立碑於中和橋以刑部右侍郎致仕章

書

魏良弼字師說新建人嘉靖進士授松陽知縣召拜刑科給事中張璁桂萼初罷相詔察其黨給事中劉世揚等議及良弼以吏部言得留尋命巡視京營劾罷提督五軍營保定侯梁永福太僕卿曾直罪武定侯郭勛家奴論團營兵政之弊又請發銀米振京師饑直聲大著會南京御史馬敷等以劾吏部尚書王瓊被逮良弼請釋之帝怒并下詔獄論贖還職三遷至禮科都給事中十一年八月彗星見東井芒長丈餘良弼引占書言彗星晨見東方君臣爭明彗孛出井姦臣在側大學士張孚敬專橫竊威福致妖星示異亟宜罷黜孚敬奏良弼

挾私帝已疑孚敬兩疏皆報聞給事中秦鰲疏再入孚
敬罷去踰月良弼復偕同官劾吏部尚書汪鉉帝方向
鉉奪良弼俸鉉孚敬俱恨良弼明年元日副都御史王
應鵬坐事下詔獄良弼言履端之始不宜以微過繫大
臣帝怒再下詔獄尋復職奪俸時孚敬復起柄政與鉉
修前卻以考察後命科道官互糾又奏上十一人不及
良弼孚敬益怒擬旨切責令吏部再考鉉別糾二十六
人而良弼及秦鰲葉洪皆前劾孚敬鉉者中外大駭良
弼竟坐不謹削籍隆慶初詔起廢籍以年老卽家拜太
常少卿致仕卒天啟初追諡忠簡

明史

辜用琬字子西南昌人嘉靖鄉舉知廣西府攜一僕自
隨清慎恬淡革土司常例省里甲夫馬靖盜息民豪猾

斂迹莅政四載民無欺罔以終養乞歸

雲南通志

魏良政字師伊新建人王守仁撫江西與兄良弼弟良器良貴咸學焉提學副使邵銳巡撫御史唐龍持論與守仁異戒諸生弗往謁良政兄弟獨不顧深爲守仁所許良政功尤專孝友惇朴燕居無惰容嘗曰不尤人何人不可處不累事何事不可爲舉鄉試第一而卒良弼嘗言吾夢見師伊輒汗浹背其爲兄懼如此良貴官右

副都御史

明史何廷仁傳

魏良器字師顏洪都從學之後隨王守仁至越時王畿爲諸生落魄不羈每見往來講學者竊罵之居與守仁鄰不見也良器多方誘之一日與同門友投壺雅歌畿過而見之曰腐儒亦爲是邪良器答曰吾等爲學未嘗

檐板汝自不知耳。幾於是稍相暱，就已而有味乎？其言遂北面守仁。錢德洪臨事多滯，則戒之曰：「心何不灑脫？」幾工夫懶散，則戒之曰：「心何不嚴慄？」其不爲姑息如此。歸主白鹿洞，生徒數百人，皆知宗王門之學。卒年四十。

二

明儒
學案

萬廷言字以忠，南昌人。虔愷子，受業於王守仁，登進士第。歷禮部郎中，出爲提學僉事，罷官歸杜門三十餘年。研精著述，尤深於易。程傳而外，未之或先云。明儒
學案

阮文中字用和，南昌人。嘉靖進士，累官貴州巡撫。時土官安國亨安智相訐殺，前撫將坐以叛逆。未決文中至，訪得實，平其事，免軍興之擾。巨寇者念擁兵僭號垂三十年，有司不能制，因不以聞。文中請於朝，發師討平之。

遷湖廣巡撫

貴州通志

鄧鏞豐城人家貧嗜學手不釋卷精於易中嘉靖鄉舉官教諭造士多成就知漢陽縣吏事精敏處置山陽荒

賦裁減冗費民免於累凡所設施綽有成績

湖廣通志

傅習進賢人由進士任大理評事以執法忤劉瑾謫理問怒猶未釋復逮詔獄後歷官副使屢建軍功終副都御史克定土官之亂

分省人物考

李璣字邦在豐城人嘉靖乙未舉南宮廷試二甲第一改庶吉士授編修升左中允署國子司業纂修會典成晉諭德歷祭酒轉吏部侍郎兼學士掌詹事府己未會試主考尋拜南京禮部尚書致仕平生樂易洞達不設崖岸人皆庇其德字焉有西野集

人物志

熊汝達字德明進賢人嘉靖進士除刑部主事歷泉州知府歲己未倭偏泉州悉力捍禦與士卒爲伍夜分披甲不釋相持月餘寇去泉人德之爲立生祠遷四川副使歷廣東左布政擢右副都御史巡撫廣東改浙江轉工部右侍郎清約無改素風尋乞歸養時年幾六旬孺慕如故親色微有不和則長跽請不命之起不敢起析宦橐以遺二弟又數年起刑部左侍郎尋遷右都御史掌南京都察院甫任復以事被劾歸所著有讀書劄記知警錄穀堂或問弋蟲集觀物彙

人物志

吳金字礪伯豐城舉人嘉靖閒知建甯潮汀賊蠶起練

鄉兵固守每戰輒斬獲奪回所擄男婦甚眾

福建通志

魏時亮字工甫南昌人嘉靖進士授中書舍人擢兵科

給事中降遷初副檢討許國使朝鮮故事王北面聽詔使者西面時亮爭之乃南面宣詔還進戶科給事中劾中官王本土論壯之十月初詔停日講時亮率同列言天未沍寒不宜遽輟俄請以薛瑄陳獻章王守仁從祀文廟章下所司三年擢太僕少卿初徐階高拱相構時亮與朝臣攻去拱已而拱復入考察言官排異已者時亮及陳瓚張檣已擢京卿皆被斥時亮坐不謹落職萬曆十二年用薦起南京大理丞累遷右副都御史攝京營戎政陳要務十四事歷刑部左右侍郎南京拜刑部尚書踰年卒官時亮初好交遊負意氣嘗劾左都御史張永明爲時論所非時亮亦悔之中遭挫抑潛心性理之學天啟中謚莊靖

明史

雷禮字必進豐城人嘉靖進士授興化司理所讞獄多
奇中民頌之如神明尋晉吏部主事歷考功郎中坐持
法失貴臣意謫大名府通判累升浙江提學副使擢南
京太僕少卿歷工部左侍郎午門樓工成加尚書督建
三殿尋掌部事晉太子太保至少傅隆慶初太監滕祥
傳造器物禮抗章劾祥并乞骸骨內批准致仕歸卒贈
太保禮嗜學明習朝典有大政記內閣行述列卿記諸

書行世

豫章書

丁以忠字從

一作崇

義新建人嘉靖進士授刑部主事錦

衣衛捕劫盜四人奏下刑部以忠廉其贓僅有一油布
鉤得物主審所繇而釋之錦衣亦服歷郎中升知河閒
府治最時熊尚書浹以直言得罪命官校督解以歸梏

拳就道人畏莫敢近至河閒以忠獨郊勞如常且謂詔使曰熊公重臣所坐非大譴向偶失上意耳何至是若不憂殺大臣邪卽有禍福某當之詔使悟遂破械聽具輿從以行卒護持無恙升山東按察副使累遷左布政使擢右副都御史巡撫山東下令革冗卒裁其餉佐以贖鍰之羨大賑諸鄉落盜多解散歸命一意拊恤甚得齊魯閒心轉南京兵部右侍郎未幾滿三品俸考績分宜相欲留之比謝弗應明年以入賀至亟疏致政所著有世美堂稟孫此呂有至行父歿割腴產以遺三庶弟舉進士授工部主事七歲不遷卒於京邸貧無以爲殯人共惜之

孫章書

熊汝器字國用南昌人嘉靖進士授上虞令升蘇州府

同知母喪服闋補松江同知禦倭有功賜金帛條陳備
倭十事略見施行歷南禮部郎中湖州兗州二府升陝
西行太僕寺少卿山西行太僕寺正卿兼整飭甯武兵
備副使入覲乞休還里居四年卒

人物志

李遷字子安新建人嘉靖進士授南京兵部主事歷武
選郎中魏國公奏孫甯侵孝陵墻地爲市肆株引甚眾
下部偕法司窮竟尚書屬遷會鞫得從減論出株引者
數十百人出知濟南府升湖廣按察副使歷左布政使
擢右副都御史巡撫眞定久之晉兵部右侍郎兼僉都
御史總督兩廣以廣東諸軍破倭斬鹵千計調狼士兵
平廣西古田禽巨寇韋銀豹等置永甯州績聞升南京
刑部尚書致仕歸家居十餘歲卒篋無餘鏹諸子鬻產

爲敘嘉隆閒南州士大夫談清節者必推李尚書云詩

文醇雅有致其傳者鶯谷山房集

人物志

張鏊字濟甫南昌人嘉靖進士選庶吉士授禮部主事遷祠祭司郎中隆興寺火奉命同中人撤大善殿佛像中人欲收其寶幢珠玉以進鏊不可遂燬之出爲浙江提學副使轉遼東苑馬卿比去遼人爲立生祠厯廣東左布政使升南京太常大理卿繇刑部侍郎超拜尚書掌南兵部致仕歸家居十三年卒生平清苦終始一節布衣蔬食四壁蕭然諸子至不能自給

豫章書

蔡國珍字汝聘奉新人嘉靖進士鄉人嚴嵩當國欲羅致門下國珍不應乞就南爲刑部主事就改吏部進郎中出爲福建提學副使以侍養歸遭母喪服除遂不出

家居垂二十年起廢籍以故官莅福建遷湖廣右參政

歷浙江左布政使以右僉都御史提督操江召爲左副

都御史歷吏部左右侍郎進吏部尚書三殿災率諸臣

請修省有詔起廢列王教等九十三人請錄用竟報寢

二十六年倡廷臣詣文華門請舉皇長子冊立冠婚言

必得請方退帝遣中官諭曰此大典稍需時耳何相挾

若是乃頓首出稱疾累疏乞休許乘傳歸國珍素以學

行稱風力不及孫鑰陳有年而清操似之家居十三年

卒年八十四贈太子太保諡恭靖

明史

江治字舜卿進賢人年十三補弟子員父玠以逋租逮

治匍匐以解父厄孫燧召而試之大奇異授以館廩比

燧殉宸濠難奔入會城縞素伏棺哭盡哀王守仁召見

器之語以學愈自奮舉嘉靖進士任刑部主事升廣東
按察僉事督學政得士爲多擢南京尚寶司卿遷太常
少卿署應天府歷卿光祿太常拜南京工部右侍郎致
仕歸顏其亭曰洗心田居騎一蹇驢挾小蒼頭與邨父
相慰勞值歲饑哺糜自給意泊如也奉詔存問年九十
二臨終戒諸子無以祭葬累縣官

豫章書

江匯字東之進賢人嘉靖進士授兵部主事歷升湖廣
按察副使浙江按察使持法峻整有豪民坐殺人行干
金求鬻獄拒之又屬柄相以請不聽竟論死轉河南右
布政使以前事中齟齬歸家居田宅無贏有遊楚臺

豫章書

李東華字景曉豐城人嘉靖進士授太常博士選工科

給事中歷吏兵科嘗上疏言精考課四事又疏言釐時弊五事進禮科都給事中卒貧不能喪里宦賻之始克

殮

林志

齊譽字文實南昌人嘉靖進士以給事謫知永嘉律已廉正究悉民瘼編派里遞班次至今便之

浙江通志

張臬字正野進賢人嘉靖進士授刑部主事以事謫靈川縣丞稍遷甯國同知歷閩蜀秦楚藩臬拜右副都御史巡撫四川值五酋稱王自雄長謀陷敘州臬檄所部兵討之賊擁長矛披溼絮列巨牛爲陳臬令揭竹爲竿悉長二丈造無聲礮五百火箭千束飛擊之無不立斃者賊盡奔木頭寨臬又置樓櫓火箭焚其草舍改奔石城寨世所稱鴉飛不到山也山博十餘里四隅壁立鳥

道亡先登者臬曰此可計而取之也密令謀者誘一首
阿黑官至則勞以酒食綵帛鼓吹旗蓋遨遊寨之麓以
誘之賊相顧錯愕乃下令盜中能捕首目一人者得弗
死有武生劉顯者南昌人能以一當百署爲先鋒獲其
土官安得祿盜眾悉降首惡阿焦林匿山後洞穴中十
日不得臬時已拜南司寇佯言當縱小醜班師賊果怠
禽之入留都適倭寇張甚或傳將圍通州犯瓜澗留都
大恐臬曰此綴兵法耳禍其在揚州乎已而果然初劉
顯累建奇績臬言之大司馬張整檄爲南京水軍守備
未幾以副總兵滅倭賊於長江識者推其將將之功焉
擢兵部右侍郎提督廣西軍務大盜張連稱號僭亂流
毒三省臬同平江伯陳王謨討平之捷聞進都察院右

都御史俄命總督閩廣軍務爲言者所中歸老鍾陵人

志

萬敏字欽夫南昌人嘉靖進士知太倉州崇明有大憲
王秦沈三人利私嵯猖獗海上敏單舸詣縣召沈至榻
前款諭之且泣且受命王秦負險弗順將謀不利於敏
亟浮海入州城會上命湯克寬勦諸海寇敏午治樓櫓
至夕三百艘畢具戰卒凡三千人牛酒之犒咄嗟而辦
將士咸大悅會戰克寬以巨艦六十乘風而進敏殿之
瞬息達崇明捕斬無算敏慮其妄殺也矯中丞令大呼
曰生禽者賞首級者弗論師中禽二千人械送至訊釋
平民千八百餘人得劇盜百七十人置之法歷襄陽同
知遷貴州僉事備兵畢節居三年御史疏其才陟貴藩

少參致仕

人物志

齊柯字文則南昌人嘉靖鄉舉署和州學正修州乘分校河南鄉試遷瑞安知縣邑苦田賦不均柯至首建度田之議請於臺司若郡每都擇公正一人董其事已自裹糧履畝握算而紀其籍民有訟者卽於田間片言取平傍邑民間之爭請受筴當道檄令度平陽田旬月亦報竣無何奉例丈量二邑抱成筴以應皆柯力也徵人補大理評事擢臨安知府過里謂人曰度兩歲俸足償逋金吾將老焉其治郡以德化民如令瑞安狀小疾投

劾去

府志

王希烈字子忠南昌人嘉靖進士改庶吉士授編修累官國子祭酒禮部侍郎改吏部兼侍講學士掌詹事府

充經筵日講嘗攝宗伯事肅府中尉某陰規爲嗣正色絕之萬厯甲戌典會試江陵子落第人服其不私卒贈

禮部尚書諡文裕

人物志

余曰德初名應舉字德甫南昌人嘉靖進士授刑部主事厯福建按察副使在刑部時與李攀龍王世貞輩相倡和歸田後詩道益振尤善五七言近體有午渠集德甫詩集同邑按察副使喻邦相均時亦以文名著山居棗曰德曾孫正崇禎己巳恩貢博雅能文著寒芳閣文稿昔邪園詩集行世

人物志

黃國華字良寶豐城人嘉靖進士守龍安時郡新設賦繁重國華惟務節省以寬民力裁革殆盡萬厯初入覲卒於京卒之前一日猶議陳地方利病其盡心民事如

此計聞士民祠祀之

四川通志

陳棟字隆之南昌人嘉靖乙丑會試第一廷試及第授編修隆慶閒擢右贊善侍班東宮適見楮畫墨污正色而諫東宮爲霽容更書時謂有公權筆諫之風卒未校士拔同郡鄧以讚第一後爲名臣世稱其鑑識未幾卒

府志

何祉字德徵進賢人嘉靖進士授行人擢戶科給事中西北諸省大饑奏請發內帑免徵輸以甦民困以母老乞便養改南京兵科條軍政四事馬政五事著爲令甲與同臺會糾王太宰瓊以此見忌出爲嘉興知府性方嚴不假人以嘖笑戢暴綏良修教勸學期月郡中大治坐蜚語罷民爲立祠

分省人物考

朱憲章字良範進賢人嘉靖進士授行人擢兵科轉京科時方造龍舟費至鉅萬憲章疏凡兩上遂停出爲四川副使歷福建參政告歸與羅洪先唐順之往還論學晚更好易推本爻繫之旨多所發明著訂頑隨筆雪里

子集

人物志

萬恭字肅卿南昌人嘉靖進士授南京文選主事歷考功郎中就遷光祿少卿入改大理寇偏通州帝方急兵事以兵部右侍郎蔡汝楠協理戎政命恭代汝楠恭列上選兵議將練兵車火器諸事皆報可明年請劇邊自效命兼僉都御史巡撫山西甫至寇犯龍鬚墩伏兵擊卻之未幾寇五萬騎至朔州恭與戰老高墓寇去事聞賚銀幣巡撫故無旗牌恭請得之濱河州縣患套寇東

掠歲鑿冰以防恭爲築牆四十里教人以耕及用水車
法民大利之以內艱歸隆慶六年河決邳州運道大阻
命恭以故官總理河道築長隄北自磨臍溝迄邳州直
河南自離林迄宿遷小河口各延三百七十里費帑金
三萬六十日而成高寶諸湖夏秋汜濫歲議增隄而水
益漲恭緣隄建平水閘二十餘以時洩蓄專令潞湖不
復增隄河遂無患恭彊毅敏達一時稱才臣治水三年
言者劾其不職罷歸家居垂二十年卒孫燦有傳明史
熊廷用豐城人嘉靖閒爲長樂典史時倭寇猖獗偏縣
城廷用登陴守禦開門令老幼俱入城存活數千人修
築濱湖民受其利福建通志
吳桂芳字子實新建人嘉靖進士授刑部主事有崔鑑

者年十三忿父妾凌母手刃之桂芳爲著論擬赦尚書
聞淵曰此董仲舒春秋斷獄柳子厚復讎議也鑑遂得
宥及淵入吏部欲任以言職會聞繼母病遽請歸起補
禮部歷遷揚州知府禦倭有功遷俸一級又建議增築
外城揚有二城自桂芳始歷浙江布政使巡撫福建父
喪歸起故官撫治鄖陽進右副都御史總理河道未任
兩廣總督張臬以非軍旅才被劾罷改桂芳兵部右侍
郎提督兩廣軍務潮州舊倭屯據鄒塘桂芳先討倭以
降賊伍端爲前驅官軍繼進一日夜克三巢焚斬四百
餘人帝嘉之令與南贛提督吳百朋乘勝滅賊而新倭
寇福建者爲戚繼光所敗方流入境桂芳百朋會調土
漢兵乘其初至急擊之倭懼悉奔甲子崎沙奪漁舟入

海暴風起皆覆溺死因建議海道副使轄東莞以西至瓊州領番夷市舶更設海防僉事巡東莞以東至惠潮專禦倭寇又進討亞元丹樓平之召爲兵部右侍郎隆慶初轉左以疾乞歸萬曆三年卽家起故官總督漕運桂芳以淮揚洪潦奔流惟雲梯關一徑入海致海涌橫沙河流泛溢而興鹽高寶諸州縣所在受災請益開草灣及老黃河故道以廣入海之路修築高郵東西二隄以蓄湖水皆下所司議行未幾草灣河工告成而河決曹縣徐州桃源其明年議塞崔鎮決口束水歸漕桂芳欲衝刷成河以爲老黃河入海之道遂命兼理河漕進工部尚書未踰月卒贈太子少保

明史

王臣字公弼南昌人爲諸生時從王守仁學嘉靖進士

知泰州以所學施之政歲饑發倉大賑請蠲米六萬餘石作諭民錄申明聖訓或以天倫構訟者勸誨懇到多感泣如初撤毀神廟改建尊經閣立胡安定祠時王艮以布衣倡道安豐延至州學令諸生盡師之一時里巷皆弦歌焉升刑部員外轉浙江僉事爲守仁撫孤不避嫌怨以廣東參議罷歸學者稱瑤湖先生

人物志

符鍾字伯聲新建人爲諸生慨然慕聖賢之學以古禮爲必可行丁內外艱俗用浮屠音樂悉屏絕之舉嘉靖鄉試卒業南雍從湛若水遊除知道州賑荒歎撫峒貉治行稱最卒於官所著有虛亭語錄

人物志

朱多烺字用晦瑞昌王府奉國將軍善爲詩與里人余曰德相倡和因介李于鱗王元美閒數吟咏往還以此

譽延海內有芙蓉園臺時建安輔國將軍拱樞亦以文

雅知名著瑞鶴堂詩集爽臺臺各二卷

府志

涂紹燿字伯聚南昌人進士邃於理學督學四川公明
並至士無遺珠自後名科甲皆出其簡拔蜀中督學推
爲第一著有四書兒訓

四川通志

朱多燝字崇良瑞昌王府鎮國中尉父奉國將軍拱樞
嘗以議禮稱旨賜敕諭有聲貴遊閒燝博雅好詩始與
多燿齊名晚益精進評者謂其沈著闊達有先進典刑

府志

萬思謙字益父南昌人聞王守仁之學恍然有悟密探
默契歐陽德一見賞歎以爲聖門心印必屬斯人嘉靖
進士知嘉定縣會倭患棘乃城嘉定以備升刑部主事

改光祿寺丞秩滿謁吏部長揖而出坐奪一月俸出爲
四川參議累遷福建左布政使署前有麗譙面五虎山
門故從旁出思謙至闕正中門改山名曰五福竟無害
閩人壯之轉南京太常卿致書江陵相稱維世以禮容
人以量願開言路自引咎江陵相故同年生意不能無
望故陽遜謝而言者伺其頤指露章引懸車例遂得致
仕歸年甫六十一耳著大學迹古中庸述微平生粹行
完操略無愧怍所居環堵歿後十六年始克葬

人物志

姜儆字君治南昌人嘉靖進士授宣城縣令升浙江道
監察御史初奉命巡視光祿條陳七事稱旨出視長蘆
鹽課繼巡按湖廣值歲侵民舍漂沒餓殍載道儆上流
民圖多方賑救百姓乃得安業復巡視山東浙江閩廣

所至有聲擢翰林院侍講學士尋丁內艱起復冠帶閒

居卒年七十五

謝志

劉曰材字汝成南昌人嘉靖進士授韶州府推官峒人怨豪家收青殺七人尸於大澤雜治無驗曰材廉得其見知者鞠之辭窮獻狀囚亦皇遽伏竟獲七尸澤中獄上論報人驚以爲神明遷刑部主事轉儀制司遷湖廣按察副使改貴州督學復爲山西參政守徐滿會石州之變寇騎迫太原督兵乘城一謀者袒而華言以入輒斬以殉眾心乃安寇亦竟出塞去歷陝西左布政使入覲歿於臨潼傳舍曰材性廉平自言三爲刑官未嘗輕入人罪所至行李蕭然旣歿而人思之

白志

李材字孟誠尚書遂子嘉靖進士授刑部主事由兵部

郎中遷廣東。奴事羅旁賊猖獗。材襲破之。周高山設屯以守。賊有三策。在新會境。調副總兵梁守愚由恩平遊擊王瑞由德慶入。身出肇慶中道。夜半斬賊五百級。毀廬舍千餘。空其地。募人田之。亡何倭五千攻陷電白。大掠而去。材追破之。石城設伏。海口伺其遁而殲之。奪還婦女三千餘。錄功進副使。萬厯初。張居正柄國。不悅材。遂引疾去。居正卒。起官山東。以才調遼東。開原尋遷雲南。洱海參政。備兵金騰。金騰地接緬甸。而孟養蠻莫兩土司介其閒。叛服不常。緬部目曰大曩長曰散奪者。率數千人據其地。材謂不收兩土司。無以制緬。遣人招兩土司來歸。而閒討抗命夷阿坡居頃之緬兵爭蠻莫材。合兩司兵敗緬眾。殺大曩長。逐散奪去。緬帥莽應裴益。

兵至孟養復擊沈其舟斬其將一人乃退緬人大舉復
讎材遣遊擊劉天俸等渡金沙江與孟養兵擊之賊大
敗擢右僉都御史撫治鄖陽坐事還籍候勘又以雲南
事被訐遂獲重譴幽繫五年論救者五十餘疏大學士
申時行復爲材申理皆不省亡何孟養使入貢具言緬
人侵軼天朝救援破敵有狀聞典兵者在獄眾皆流涕
而楚雄士民閭世祥等亦相率詣闕訟冤帝意乃稍解
戍鎮海衛材所至輒聚徒講學學者稱見羅先生繫獄
時就問者不絕至戍所學徒益眾許孚遠方巡撫福建

日相過從久之赦還卒年七十九

明史

葉修字克慎南昌人由進士任漢陽府司理性剛直不
阿常面折人過藩臬皆憚之漢陽學廢賴以興復漢川

賦爲潞藩奏割三之一民甚苦之修請以衡州有歲額

解德安倉者移抵漢川民爲祠祀焉

湖廣通志

姜博字克約南昌人嘉靖進士授溧陽縣令擢刑部主

事累升浙江僉事秉性剛直不阿附權貴解組歸居家

四十餘年卒八十二祀鄉賢

志

方孟縉武甯人早喪父事母孝由進士授刑部主事時

貴戚張氏構大獄不決孟縉折斷平允理淮漕值江西

吳城兌運軍民交變孟縉一訊

謝志誤詢

輸服議改就省兌

至今民便之所著有雁里殘稟

分省人考

劉顯字草堂南昌人生而膂力絕倫稍通文義家貧落

魄之叢祠欲自經神護之不死閒行入蜀爲童子師已

冒籍爲武生嘉靖三十四年宜賓苗亂巡撫張臬討之

顯從軍陷陳手殺五十餘人諸軍繼進賊盡平顯由是知名官副千戶南京振武營初設用兵部尚書張璠薦署都指揮僉事僉書浙江都司遷參將分守蘇松倭犯江北偏泗州整檄顯防浦口顯測賊將遁追擊至安東方暑披單衣率四騎誘賊伏精甲岡下伺賊出潛燬其舟賊敗走舟舟已焚死者無算尋遷副總兵協守江浙振武營兵變後諸將務姑息兵益驕給事中魏元吉薦顯署都督僉事一軍帖然廣東賊起詔顯充總兵官鎮守會福建倭患棘顯與參將戚繼光連破賊賊略盡錄功進先所廕世職二秩隆慶改元移鎮貴州征都掌蠻克寨六十餘俘斬四千六百拓地四百餘里得諸葛銅鼓九十三銅鐵鍋各一鍋狀如鼎大可函牛刻畫有文

衫相傳諸葛亮以鼓鎮蠻鼓失則蠻遁終矣錄功進顯都督同知己而勦餘孽復俘斬千一百有奇都掌既滅顯引疾求去而以有司阻撓爲言詔聽顯節制顯益行其志擊西川番沒舌丟骨人荒諸砦斬其首惡撫餘眾而還建昌俛厦洗馬諸番咸獻首惡西陲以甯九年冬

卒官

明史
白志

宋國華字崇樂奉新人嘉靖進士授休甯知縣貴溪張真人奉命有事於齊雲責供具苛甚國華詞其陰事欲發之張恐遜謝而去升兵部主事歷職方郎中擢四川提學副使敷教以寬憐才若不及累遷雲南左布政使發黔國侵奪事逮其左右戍邊者三人轉應天府尹抵家病卒

人物
志

劉廷梅字與和南昌人天性孝謹父客死維揚廷梅迎喪以歸涉江風惡幾覆舟抱棺而慟呼天請與俱溺尋濟嘉靖進士知歙縣縣治故事供張令君甚設盡麾出之政令清簡訟庭幾闕無人比奉徵書敝衣羸馬以行除南京兵部主事歷知漢陽府擢廣東副使致仕

府志

衷貞吉字孔安南昌人嘉靖進士授刑部主事遷南禮部郎中出知松江府吳淞江久塞侵濱河田出所節蓄金錢濬之竣役而民無擾高拱釋憾於故相徐階迎合者上下其手郡中告密成風顧獨意無所附量徙陝西行太僕少卿萬歷初改河南提學副使精品藻寬條約詳訓迪得人士心歷浙江左布政使擢右副都御史巡撫河南比歲浔饑請發帑金五萬兩米九萬餘石分部

周賑召拜工部侍郎左都御史河南人爲立生祠卒贈

太子太保諡簡肅

豫章書

黃樞字翼卿南昌人嘉靖進士授嘉善知縣精嚴案牘發摘無遺尤留心里甲役法均平猾胥爲之斂手邑大潦禾盡漂詣當道免冠頓首請括帑金以抵恆賦升南京工部主事歷武庫郎中遷知潮州府歲荒請蠲設賑不遺餘力卒於官廉介終身不易祀潮州名宦

人物志

胡杰字子文豐城人嘉靖進士改庶吉士授編修冊封

楚遼二藩盡卻餽遺性剛方不屈權貴歷南祭酒升太

常寺卿有劒西臺

明詩小序府志

雷夢麟字伯仁進賢人嘉靖進士授無爲知州遷工部員外郎復除刑部明法律善持平駙馬鄔景和失撰青

詞且辭賞忤旨坐劾屬夢麟論鄔不嫺文學罪在辭賞
薄治足矣讞上報可時震位未建有曾御史佩復命誤
用青表上怒甚疑有譏訕下御史獄夢麟復佐尚書議
當調外有旨切責已僅免御史官嘗奏進所著讀律瑣
言又條上罪囚永戍者只以戍後生子代伍免行句原
籍議中格後竟行之遷天津兵備副使歷陝西左參政

府志

李栻字孟敬豐城人遂子嘉靖進士授魏縣知縣魏俗
健鬪尚鬼栻申明教化酌定禮條使民誦習又令無饕
會無醵緡錢以粟易之計其羨爲社倉而規其息項之
獄訟衰減鄉社困藏至八千餘石調肥鄉塞邯鄲鄒米
二口衝隄濬漳河故道灌田九里民祠祀焉拜監察御

史萬厯初巡按湖廣還以臺中久次協理大察竟外遷
浙江副使上疏致仕有困學纂言惜陰彙及輯論語外

編人物

方來崇字士功新建人與弟來獻同中嘉靖乙卯鄉試
登丙辰進士授無爲知州愛民潔己著有初政紀錄考
選刑部歷員外郎會方士詔獄執法忤旨挂冠歸林居
四十載講學著書與王元美李于鱗諸公爲詞林伯仲
有元隱軒諸集行世

府志

喻南嶽字極夫新建人嘉靖進士授六安知州適倭寇
起海上改調通州歷兵部員外郎中遷廬州知府新安
富人挾重貲遊無爲州州人某利其有拉殺之而匿其
尸事已半載嶽一日坐堂上問左右曰階之下披髮短

裳而水淋淋者誰邪左右無對嶽曰若有冤第爲若理
卽沐浴禱於城隍神明日呼左右一人來授以名居令
往捕之一訊輒服合郡駭服晉四川副使備兵建昌建
昌故在蜀西徼爲瀘水所隔備兵使者憚不敢渡遙制
雅州獨閩帥鎮其中多專恣喜事失蠻心嶽叱馭趣渡
瀘諸蠻望見車騎悉蒲伏迎道左嗣是閩帥凜凜自束
不敢有所干犯諸蠻亦大喜尋以疾引歸番漢人挾轅
泣送者數百里不絕

府志

李瑞芳字時禎豐城人嘉靖鄉舉授武義知縣多善政
以憂去縣人爲之立碑補永興縣值大荒仿周禮弛役
緩征嗇神殺禮積粟之法民賴之復除知華容歷承天
府通判引疾歸所在俱祠名宦

人物志

彭懋字汝德南昌人嘉靖鄉舉任順昌知縣庶事畢舉
尤加意學校日進諸生親爲析義校課歷工部郎中廣
東按察僉事歸無長物年九十四卒

人物志

鄧漢字潔之豐城人少孤貧殯父薄終身不忍革其衣
居母喪數日水漿不進嘗拾遺金坐待失者舉還之由
歲貢任休甯常熟訓導遷金山衛教授作人以明倫敦
行爲先致仕歸年九十卒

安志

熊登之字養直新建人博學強記舉明經絕意仕進與
同邑舒泰等闢明理學著有性理解聖學正宗行世事
繼母徐至孝四方執贄者常數百人督學王宗沐極尊
禮之未艾而歿門人私謚貞孝先生泰好學有質行母
歿哀毀廬墓事繼母如所生推產以讓其弟直指采風

以孝聞遽卒詔旌其閭

安志

葉香字惟德豐城人痛父早亡有感輒號慟不止母性嚴竭力承順必得其歡心婦稍拂於母卽同跪寢門外怒猶未釋輒遣歸逾年母爲娶妾受之竟不一御母問其繇泣曰顧婦尚未可絕耳母感其意卽日迎歸新建魏良弼稱之曰孝行聞於朝野風表化諸鄉閭嘉靖閒

旌

安志

袁坡字邦彝豐城人母死廬墓泣血三年與鄒謙之王汝止諸先生講學遂棄制舉業結廬山中從遊之士雲

集平生不事產業晚歲家益薄讀書談道晏如也

安志謝

志舊案鄧漢熊登之葉香袁坡白志皆不載今從安志采入安志孝義傳尚有南昌章彬黃連徐德明李溥錦新建崔琬鍾文奎鄭山鍾鎮豐城劉靜徐濤進賢支麟饒用文陳相靖安陳伯宣漆維縉黃廷輝羅汝德奉新

熊金玉甯州陳龍武甯黃垣陳仲賢又有陳
繼晉胡輔不詳何縣人俱附錄姓名於此

劉建字懋中豐城人嘉靖鄉舉任汀州青州二府推官
所至讞決多所平反閩倭亂後承檄巡行泉州便宜賑
恤全活甚眾在山東殲顏神鎮劇盜均臨朐差役汀青
兩郡俱立生祠致政歸

府志

李輔字子卿進賢人嘉靖進士授中書舍人選監察御
史萬厯初督學南直行部不攜胥吏弊蠹一清復刷卷
京畿會江陵相遭父喪欲奪情言路伺指保留輔獨不
預厯山東巡撫工部尚書卒贈太子少保

人物志

唐堯臣字士良少事王守仁講學有才名嘉靖鄉舉授
湖州府通判遷桂林府首設方略禽土酋蕭公反赦而
賚之令稽首受約於麾下眾莫敢犯升杭州府同知擢

浙江按察僉事備兵台嚴料理軍饟不絕倭至堯臣以
戚繼光兵連破之增俸級一等尋歸著兩餘閣筆二卷

府志

吳子金字維良南昌人爲邑諸生從王守仁學及守仁
歸越子金與魏良政徒步往從之三年充然有得而歸
嘉靖乙酉同良政登鄉舉時嚴嵩方掌北雍延之訓子
未幾輒謝去竟不仕以講學終著壁箴屏銘夜氣說諸
篇邑人陳源受學於子金後師安福劉邦采而友南城
羅汝芳造詣益進

人物志

徐作字季儒南昌人嘉靖進士初任刑部主事歷藩臬
轉京堂至工部左侍郎掌本部尚書事考績廕長子懋
勛其後復以奉敕提督黃河大工及督建乾清坤甯兩

宮大工晉都察院右都御史時爭冊立忤皇貴妃意冠帶閒住迨神宗晏駕光宗起擢工部尚書作卽以是年卒熹宗登極其家人屢疏循例乞請五典奉旨下部議覆值魏黨擅權停閣崇禎十六年部議題補廕謚會闢賊犯闕事遂寢後祀鄉賢

人物志

鄧以誥字汝欽新建人嘉靖鄉舉年十九勵志學問與弟以讚家庭切劘授建陽教諭鳩工遷學費至數千金未嘗煩有司升廣東博羅知縣邑恆燠民多病癩傳染以誥下車適七里驛有山勢甚磅礴諸癩三百人羣聚其閒男子擔負至者輒搶女子至輒執而淫之以誥震怒曰癩本天刑不悔過又公然以強姦強盜犯大辟邪令諸遇癩者任持長槍刀直拒之癩見所懸示猶不爲

意以誥乃佯募壯夫約日驅縛三百人盡沈之江於是癩一夕遁去奏最遷刑部主事以誥曰此王文成論學之署敢以聽斷而忘夙夜自考乎是時有投匿名言鄭貴妃危太子事題曰續憂危宏議輔臣沈一貫誣少宗伯郭正域爲之連及部郎于玉立禍不測以誥密言於司寇曰妖書所坐無左證欲以莫須有殺天下士非法之平也言甚迫切竟得從末減擢衡州守郴大饑饑民萬餘人闖入礦山爲盜格殺官兵參政鄒學柱議大舉進剿以誥曰此愚民爲救饑計非敢爲亂也當一面持檄招安俟其解散徐賑之賊得檄果如約解散俄常甯又大饑黠徒誘饑民數萬復入礦爲盜學柱欲以前所治郴策治之以誥曰事安可膠柱饑民所以敢於復盜

者度吾又必招安之也乃遣銳卒出其不意直趣至甯
凡七閱月罪人斯得梟首惡三十輩餘黨悉散於是流
亡麇集乃大發倉賑之甯境以平在衡三年報政遂上
疏引疾致仕歸田垂數十年著衡州府志會心編澹臺
祠講章及遺藁一卷

人物志

鄧子龍豐城人貌魁梧驍健絕倫兼通翰墨嘉靖中江
西賊起掠樟樹鎮子龍應有司募破平之累功授把總
萬歷初從大帥張元勳討平巨盜遷銅鼓石守備尋擢
署都指揮僉事掌浙江都司會麻陽苗金道侶等作亂
擢參將討之大破賊解散其黨五開衛卒胡若虛等火
監司行署靖州銅鼓龍里諸苗咸響應爲亂子龍火其
東門以致賊而潛兵入北門賊遂滅十一年閏二月緬

旬犯雲南詔移子龍永昌木邦部耿馬有姦人罕虔與
岳鳳同爲逆子龍急戰攀枝樹下陣斬虔虔子招罕招
色奔三尖山令叔罕老率蒲人藥弩手五百阻要害子
龍盡知賊閒道乃命裨將鄧勇等提北勝浪渠諸番兵
直搗賊巢而預伏兵山後來擊夜半上生禽招罕招色
罕老及其黨百三十餘人尖山巢空會劉縱亦俘岳鳳
以獻帝大悅進子龍副總兵永昌騰衝夙號樂土自岳
罕倡亂始議募兵所募多亡命乃立騰衝姚安兩營劉
縱將騰軍子龍將姚軍不相能致軍鬪帝以兩將皆有
功置不問旣而縱罷劉天俸代天俸逮遂以子龍兼統
之子龍右姚兵每工作輒虐騰兵及用師隴川子龍故
爲低昂騰兵大不堪欲散去副使姜忻令他將轄之乃

定而姚兵久驕因索餉作亂由永昌大理抵會城所過
剽掠諸兵夾擊之俘四百餘人亂始靖子龍坐禪官下
吏十八年孟養賊思箇叛子龍方對簿巡撫吳定請令
立功自贖無何丁改十寨賊普應春霸生等作亂勢張
甚定大徵漢土謝志軍令子龍軍其右遊擊楊威軍其
左大破之斬首一千二百級招降六千六百人帝爲告
謝郊廟宣捷受賀復子龍副總兵署金山參將事先是
猛廣土官思仁烝其嫂甘線姑欲妻之弗克偕其黨丙
測叛歸緬數導入寇二十年攻孟養犯蠻莫土同知思
紀奔等練山子龍擊敗之乃去子龍尋被劾罷歸二十
七年朝鮮用師詔以故官領水軍從陳璘東征倭將渡
海遁璘遣子龍偕朝鮮統制使李舜臣督水軍千人駕

三巨艦爲前鋒邀之釜山南海子龍素慷慨年逾七十
意氣彌厲欲得首功急攜壯士二百人躍上朝鮮舟直
前奮擊賊死傷無算忽他舟誤擲火器入子龍舟舟中
火賊乘之子龍戰死舜臣赴救亦死事聞贈都督僉事

世廕一子廟祀朝鮮

明史

鄧以讚字汝德以誥弟生有異質出語類夙儒隆慶五
年舉會試第一廷試第三授編修萬厯初座主張居正
枋國政以讚時有匡諫居正弗善也移疾歸久之補原
官旋引退詔起中允至中途復以念母返再起南京祭
酒就擢禮部右侍郎復轉吏部再疏請建儲且力斥三
王並封之非言中宮鍾愛元子願早正春宮視臣民尤
切陛下以厚中宮而緩冊立殆未諒中宮心況信者國

之大寶建儲一事屢示更移將使詔令不信於天下非所以重宗廟安社稷也會廷臣多諫者事竟寢尋召爲吏部右侍郎力辭不拜以讚登第二十餘年在官僅滿一考居母憂不勝喪而卒贈禮部尚書諡文潔

明史

徐杰字汝高新建人隆慶進士授龍游知縣擢廣西道御史請告起河南道升光祿少卿萬曆癸巳值有三王並封之旨杰上疏語激切遂削職歸子紹燧己未進士

官廣西左布政使

人物志

張位字明成新建人隆慶進士改庶吉士授編修預修世宗實錄位以前代皆有起居注而本朝獨無疏言史官充位無以自效宜日分數人入直凡詔旨起居朝端政務皆據見聞書之待內閣裁定爲他年實錄之助張

居正善其議奏行焉後以救吳中行趙用賢忤居正意已遷侍講抑授南司業未幾謫徐州同知居正卒用薦擢南京尚寶丞俄召爲左中允管司業事進祭酒疏陳六事多議行以禮部右侍郎教習庶吉士引疾歸詔起故官協理詹事府辭不赴久之以申時行薦拜吏部左侍郎兼東閣大學士王錫爵還朝帝適降諭三王並封以待嫡爲辭而位遽請帝篤修交泰早兆高禩議者竊哂之錫爵去趙志皋爲首輔位與志皋相厚善志皋衰位精悍敢任政事多所裁決進禮部尚書改文淵閣以甘肅破賊敘功加太子太保復以延鎮功進少保吏部尚書改武英殿位初官翰林聲望甚重朝士冀其大用及入政府素望漸衰主事丁應泰劾楊鎬喪師言位與

鎬密書往來朋黨欺罔鎬拔擢由賄位得之帝怒下廷議遂奪職閒住尋除名爲民位有才果於自用任氣好矜其敗也廷臣莫之救天啟中復官贈太保諡文莊

明史

謹案位諡舊志並作文端

張偲字士忠南昌人隆慶進士歷官廉介布衣蔬食與諸生無異由福建布政仕至都御史巡撫貴州卒於任家居城南敝廬不蔽風雨

人物志

范謙字含虛豐城人隆慶進士歷官禮部尚書嘗充正史總裁請復建文年號修少帝本紀及景泰實錄詔報可鄭世子進歷書奏請獎諭僉事邢雲路言治歷四策監官詆之謙謂監官拘守成法乞以雲路提督不報卒

諡文恪有雙柏堂集

府志縣志

羅萬象字光大南昌人萬厯舉人令潛江會邑大侵饑民聚眾相奪勢不可止萬象取巨魁二人立斬之揭竿以示餘烏散復建北關以固圉創教場以習騎散徵糧之法立連環票善政不可勝舉

湖廣通志

劉貝字瞻華南昌人萬厯舉人崇安教諭升廣西永康令調繁藤縣以撫安猺獞功升潯州府同知厯任多有實政篤志孝友年三十八以養母乞休著有說夢集

廣西

通志

李啟美字應成豐城人萬厯進士改庶吉士授檢討國儲未建會有三王並封之旨言者多獲譴責啟美上書政府謂東宮原無待嫡之條元子舊無分封之例豈惟失天下人心恐天地祖宗亦復悵然於此舉矣時論壯

之是歲值萬壽聖節又上疏陳時政并獻四箴時爭傳

誦比於前代陸敬輿著有李太史橐三卷

白志

李光祖字繩伯南昌人萬厯進士授溧陽知縣邑有圩
塍爲積澇所齧發帑金築之治賦第設斂甬聽民自爲
委輸民不苦賦賦亦不違行道人以暴疾仆於市門無
賴者借以誣市中人一訊立雪遷南京吏部主事卒溧
陽人請祀於名宦祠

府志

樊良樞字尚植進賢人萬厯進士令仁和與人推誠無
隱徵比不事鞭扑水災議蠲賑悉心籌畫全活無算遷
浙江提學以不作魏瑄祠碑文解印綬歸著有易解

通志

羅憲凱字元甫豐城人萬厯進士令貴池清介絕倫人

莫能干以私嘗捐俸修復齊山書院以勤勞卒官所著有金陵北征入計諸草

府志

李瑄豐城人由進士擢御史遷福建僉事奉表入都列首輔申時行十罪語兼侵王錫爵削籍家居三十年不

復出

白志

劉曰甯字雲嶠南昌人少博學多才志識宏達毅然以天下爲任萬歷進士改庶吉士與陶望齡焦竑黃輝董其昌才名相先後授編修奉母假歸性至孝痛父失養母時年七十餘入問寢興依依無異童子時復奉母入長安會纂修正史凡爲公卿名臣傳紀三百三十有六升右中允充東朝講讀官樞采議起中貴四出海內騷動南康守吳寶秀忤湖口稅璫李道逮治詔獄曰甯發

憤上書請撤礦稅諸使宥寶秀疏入留中曰甯遂奉母南歸尋起右諭德掌南京翰林院事由大司成晉少詹學士禮部侍郎改吏部卒予祭葬贈禮部尚書諡文簡

人物志

丁此呂字右武新建人萬厯進士自漳州推官厯湖廣參政所至皆著政績權貴以計典修怨謫戍粵東尋以薦起天津海防贊畫未赴卒

丁氏世美集

吳銓文字行甫更名遇南昌人萬厯鄉舉爲漢陽推官有鄉猾以畝鬻富生蕭某紿生值而實無畝生往案宿他莊猾偵其僕舊私莊婦夜羣擊殺婦質明執生誣搆屬銓文訊狀銓文曰生暱媼復怒殺媼邪論報惟輕而後鞫者竟入生坐償會御史慮獄生桎梏候鞫其僕直

履赭衣懷刃詣直指前一手拔刃一手挾冤狀大號曰
殺莊婦者我也語畢立自引決直指愕甚閱牘得銓文
所著讞語遂直生而出之自是疑獄悉下銓文咸質神
矢公以聽適楚宗以羸呂事構王而噉趙中丞可懷爲
王所倚一日多宗白事復抵牾遂攘臂格中丞至死銓
文時在黃聞變曰非撫莫靖迺夜馳省論諸宗以朝廷
優養德意會御史按安陸銓文率諸李官往謁御史曰
當以反聞眾默然銓文曰殺重臣誠不法幸猶未斬關
掠藏也脫不解毋迺驅使速叛邪御史用其言不月餘
事定升雲南安州知州題改興國州入覲卒

人物志

萬國欽字二愚新建人萬歷進士授婺源知縣徵拜御
史言事諫慨不避權貴尚書董份大學士申時行王錫

爵座主也屬浙江巡按御史奏請存問國欽言份諂事
嚴嵩居鄉無狀不宜加隆禮事遂寢初吏部員外趙南
星戶部主事姜士昌疏斥政府私人給事中李春開以
出位糾南星士昌而其黨陳與郊爲助刑部主事吳正
志上疏言春開與郊媚政府干清議且論御史林祖述
保留大臣之非於是御史赫瀛集諸御史於朝堂議合
疏糾正志以臺體爲辭國欽與周孔教獨不署名瀛大
恚盛氣讓國欽曰冠豸冠服豸服乃日以保留大
臣傾善類爲事我不能苟同瀛氣奪疏不果上奄人袁
進等毆殺平民再疏劾之火落赤諸部頻犯臨洮鞏昌
帝召見時行等於皇極門咨以方略時行以款貢足恃
爲言未幾警報狎至乃推鄭洛爲經略行邊實用以主

款議也國欽抗疏因列上時行納賄數事帝謂其淆亂國事誣污大臣謫劍州判官吏部尚書陸光祖擬量移國欽爲建甯推官帝以特貶不宜遷切責光祖而盡罷

文選郎中王教等大學士趙志皋疏救亦被譴責國欽

後歷南京刑部郎中卒

明史 白志 舊案國欽字安志府志俱作和甫

黎道炤字明中南昌人萬歷進士知桐城縣擢諫垣歷禮科右給事中神宗時冊立未定大臣多阿匿陰陽上下相持不決道炤每疏卽言他事必爲連類摘發歲甲午有旨皇長子出閣講學預令采買金珠等物費三十餘萬而部臣疏請儀仗侍衛拜賀禮持不下且責言者道炤歎曰此吾死諫日也卽草疏約略千餘言一無避忌疏入上震怒株連臺省各降革有差道炤爲民冊立

既定恩復冠帶厥後諸羽翼者多召用至大官而道炤
己先卒光宗遺詔議卹始贈光祿寺少卿尋用子元寬
仕晉階中憲大夫崇祀鄉賢

人物志

章邦翰字公佐南昌人萬歷進士知潮陽縣拜監察御史
巡鹽兩浙疏陳嵯政利弊伸枉獄絕請謁用例轉衡
永僉事時議開銀礦政府致書屬察所屬有礦處歎曰
言利豈人臣事君之義且擾民不復政府書五年不得
調既防粵海簡練軍伍飭舟楫謹扞撤設方略多捕生
倭及首功其闌出中土物悉籍之以佐軍需轉參政督
儲山東升雲南布政使未任請告歸卒東粵人祀之名

宦

人物志

陳道亨字孟起新建人萬歷進士除刑部主事歷南京

吏部郎中同里鄧以讚衷貞吉亦官南都人號江右三
清遭母喪家燬於火僦屋以居窮冬無幃妻子拾遺薪
爇以禦寒或有贈遺拒弗受由湖廣參政遷山東按察
使右布政使轉福建爲左所至不私一錢以右副都御
史提督操江光宗立進工部右侍郎總理河道妖賊徐
鴻儒作亂道亨守濟甯扼諸要害以衛漕舟事平增俸
賜銀幣尋拜南京兵部尚書參贊機務楊漣等羣擊魏
忠賢被譴責道亨憤偕九卿上言高皇帝定令內臣止
供婦除不得典兵預政陛下徒念忠賢微勞舉魁柄授
之恣所欲爲舉朝忠諫皆不納何重視官豎輕天下士
大夫至此疏入不納道亨遂求去歸踰年卒道亨貞亮
有守自參政至尚書不以家累自隨一蒼頭執爨而已

崇禎初贈太子少保謚清襄

明史

饒景暉字廷奎進賢人萬厯戊子與二兄景暘五弟景暉同舉時謂三饒而景暉以連第筮仕部曹出守順慶轉福建提學副使考滿有聲復以參政視學科歲試凡再周蓋異數是時景暉四弟景曜督學兩浙同日命下朝野榮之厯升四川巡撫清寬厚重撫御有方屬賴以安尋推兵部侍郎理南京戎政會有忌者拂袖歸卒贈尚書予祭葬

人物志

萬建崑字季瑜南昌人虞愷之孫廷言之子萬厯進士除荊州府推官人以年少易之及視事習爰書精識決雖老吏不如時江陵相籍貲產株連滋蔓建崑歎曰奈何以朽骨示威稜請一切弛之嘗核長沙郡牘有以贖

鍰故淹罪人子孫者具狀請豁臺允之檄贖十金以下勿復追十五郡俱得視此以卓異徵故事未三十不與給事御史之選當軸者重建崑才謂增年可得要地建崑持不可乃授禮部儀制司主事教習駙馬益勤職業嘗曰溢而倖職以外靡而竊職以內兩無取焉時以爲名言會廷臣請預建太子建崑亦侃侃具疏宵人作蜚語揭之通衢金吾上其事神宗震怒治言者建崑謫武岡尉歸而從其父講學注易所造益深家食二十餘年臺使銓部交薦皆留中不下光宗登極擢南京尚寶司卿不數月而歿侍御陸師贇及同里宦游者資其含斂乃以喪歸建崑三世登顯仕而田宅不踰中人里中言清白吏者首稱焉

人物志

劉定國初名是字去非南昌人浹之次子萬厯辛丑會魁改名定國初授全椒知縣以能調江都行取兵部主事厯尚寶少卿尋升太僕寺少卿光祿寺正卿遷兵部侍郎以修理皇陵功升南京工部尚書致政歸所著有奏疏學易劄記鴻雪館集行世

人物志

熊維寬字仲舒南昌人太僕卿瑞之仲子績學著書萬厯中豫章飛雲社制藝矜式字內維寬主壇坫焉由博士入太學所著有寤堂集大雅堂集子曰馮崇禎壬午鄉薦有臥雲堂集孫一瀟別有傳

人物志

涂宗濬字鏡源南昌人萬厯進士由知縣擢御史候入朝鮮上章請援之出巡廣西平田州山賊置衛開屯巡河南請帑賑饑巡順天蠲稅金八萬厯升僉都御史巡

撫延綏河套猖獗以戰守自任部落不敢犯擢副都御史破寇於榆林於神木擢宣大總督累晉兵部尚書以順義王就封加太子太保廕錦衣世千戶乙卯乞休歸及已老復起原官不得辭力疾以赴數日卒贈少傅謚

恭襄

人物志 縣志 府

徐卽登字德俊

據縣志補

豐城人萬歷進士師事同邑都御

史李材當材官滇南時奏緬捷中蘇御史之說逮繫獄

卽登爲禮部官暇卽獄中受業淹郎署垂十年始遷福

建提學副使閩舊爲朱子教化之地卽登崇聖學正文

體與諸生窮性命指歸士風丕變由福建參政晉河南

按察使辛丑考察調用旣歸杜門謝賓客弟子益進著

儒宗要輯儒範正學堂彙來益堂彙易書詩春秋禮記

說遜國諸臣錄詩文若干卷撫按薦章凡數十上天啟

六年卒年八十有二

白

陳源字本潔南昌人少從吉水顏鈞遊久之忽自疑質
於安福劉師泉劉曰學獨苦功利人人深耳源請曰學
貴通性命功利乎何有劉曰功利從性命入也源乃大
悟盡棄其學轉學於劉貢京師授石埭訓導歷官崇王
府教授丁內艱歸服闋補阜王府教授源爲學官九年
兩署縣篆所至皆多所成就而貧日甚適盱江羅汝芳
相就講學源每面正之羅曰公事學久終不回頭悟邪
源正色曰發吾方悔所悟公更令悟所悔乎嘗遇事以
過自訟曰吾不欲其速化懼創懲不深耳萬曆丁亥卒
年七十九祀府學鄉賢祠及門皆知名士章潢其一也

府志
縣志

章潢字本清南昌人十三歲見鄉人負債縲紲者惻然爲之代償與萬思默同舉業已而同問學有問先生近日談經不似前日之煩者潢曰昔讀書如以物磨鏡磨久而鏡得明今讀書如以鏡照物鏡明而物自見構洗堂於東湖聚徒講學聘主白鹿洞書院御史吳安節疏薦授順天儒學訓導年八十二卒所著圖書編百二十七卷論止修則近於李見羅論歸寂則近於聶雙江而其最諦當者無如辨氣質之非性離氣質又不可覓性則與劉蕺山之言若合符節矣

明儒學案

胡汝甯字似山南昌人萬厯進士授湖陽知縣擢禮科給事中神宗末年國本有搖動之意汝甯引經執義草

疏以上事遂寢尋請告歸里南贛巡撫洪瞻祖乃其門下士也嘗登堂見其數椽不葺輒之出山汝甯仰視不答瞻祖歎息而出所著有掖垣奏議若干卷

安志

萬煒字閣卿南昌人生而值父暮年家道日落至無以爲養日課蒙計其所入充衣帛食肉之資勉勵發憤補弟子員父沒事母孝愈篤遇寢疾必同婦籲天願減己算延旦夕萬厯丙午歲貢授浮梁訓導矜式多士惟以躬行實踐爲本卻貧生入庠之費甚貧者助以金遷吉水教諭訓迪不倦如浮梁時鄒元標倡道東南晉接必施隆禮歿廿餘年兩邑弟子員請祀名宦

人物志

劉一焜字元丙萬厯進士授行人厯考功郎中佐侍郎楊時喬典京察盡斥執政私人已改文選遷太常少卿

以憂去久之擢右僉都御史巡撫浙江帝遣中官曹奉建鎮海寺於普陀山一焜偕巡按李邦華爭不可弗聽織造中官劉成卒一焜累疏請勿遣代已得請會命中官呂貴護成遺裝奸人因請留貴督織造疏直達禁中一焜與邦華極論其罪帝卒命貴代之貴既任條行十事多所侵擾一焜疏駁且禁治其爪牙貴爲斂威一焜以暇築龕山海塘千二百丈濬復餘杭南湖民賴其利御史沈珣誣訐其贓私一焜自引去卒贈工部右侍郎弟一煜兵部郎中

明史劉一煜傳

劉一燠字著泉南昌人萬曆乙未進士是科劉氏同第者五人一爲太府廷柱一爲太僕洪謨而燠與駕部一煜太傅一煜復爲同堂昆弟海內稱科名盛事筭仕祁

門令邑狹民不足於食仰他郡之轉輸一爇勸民出穀
置社倉準朱子法鄉各建倉凶荒得不告匱丁內艱服
闋補上海縣苦逋賦追呼漠不肯應一爇親自挾格寬
單民而先官戶民健訟隙起睚眦則網澤中遺骸爲訟
端廉得其實特嚴反坐之條七堡爲往來孔道遊民日
繇浦中與風波爭命一爇疏其故道建閘以時蓄洩至
今利賴之尋選授兵科給事中卒京邸子斯陞字士雲
制藝盛行海內是時臨汝有陳艾章羅柄四家豫章有
劉余鄧三子劉卽斯陞余名正垣鄧名履古

人物志

趙邦佐字勉吾新建人少穎異諸經子史目過卽成誦
長補郡庠益下帷攻苦遇試輒高等士林爭相引重力
行善事敦倫勸學守謙好施識者謂邦佐厚種德必大

江世文元卷一百三十一南昌府
顯子繼武亦能嗜古好學後邦佐以孫曰冕貴贈通議

大夫

人物志

丁永祚字爾錫南昌人弱冠試儒童第一遂舉於鄉六
上公車不利謁選授德化令德化僻小庠士多他邑人
永祚爲作南門以疏風氣邑始有科第調福清縣城險
且庠薄屢議增拓而以費鉅莫敢任永祚力肩其役民
不告擾且刻石頌功以治行異等除知太倉州補禹州
擢刑部員外奉命獻江南獄豁免大辟謫戍數百擢知
寶慶府晉秩按察副使仍理郡事未幾實補雲南糧鹽
道抗疏乞休以參政致仕府志
熊劍化字神阿豐城人萬厯進士授增城令調繁華亭
自奉簡約如寒素一切讎集魄遺謝卻月俸外一介不

苟取比將赴召垂橐枵然兩蒼頭敝衣如故父老歎曰
世安知華亭宰廉介有是邪擢御史旋以假歸所著雲
閒集數卷燬於兵

人物志

李鼎字長卿新建人天資瑰異援毫風雨馳驟咄嗟數
千萬言歲庚寅扯力克火落赤擁眾入據陝西莽刺川
洮河大震鼎方在京師草安邊策六篇籌扯火二酋事
甚悉相國王錫爵許國見而奇之適鄭洛以大司馬經
略西邊二相國具言鼎才俾贊畫幕府鼎於盛暑中閒
關七塞幾萬餘里所過自督撫將軍而下莫不握手交
權鼎益極論諸關塞得失靡有避忌卒佐鄭司馬功成
檄諭扯力克東歸而革火落赤市賞逐令遠徙者鼎之
力也無何日本酋平秀吉將謀篡國逐朝鮮王李昞大

司馬石星聞於上一時競議東征鼎又著海策六篇合
前安邊策六篇草疏上之下大司馬議覆當是時鼎以
布衣獻書輦下君相咸虛懷采納名噪海內鼎治春秋
宗服虔治詩宗鄭康成所著經詁二卷簡確質古學者
傳誦

人物志

彭埒字仲升南昌人爲諸生時兄彭在賣藥燕市偶與
羣鬪一人病發死下在於獄埒急鬻衣裘器具充路費
奔赴辨白留滯五年覓館穀供橐餽值熱審在暴疾埒
身代桎梏囚首庭階極辨得白歲月既久郡削其弟子
籍入成均萬厯庚子中順天鄉試以親老就漳平縣令
調繁上杭縣有富人陳昌書者殺人應死或欲飭法而
旁移其罪埒力爭不可諸所秉正執法多此類秩滿遷

常州府丞未半載解組歸家無擔石初刻有畸人集繼刻有匡山九子社集九子者樊良樞戴九元余槩張超張儲胡欽華余欽耀李良也子份萬厯戊午舉人官至副使任永平知府

府志

胡欽相字南渚南昌人萬厯甲午鄉舉居家篤踐履嚴氣介性爲時所敬憚未及仕而歿子鴻漸順治甲午舉

人

府志

喻致知字無知新建人萬厯進士授宜興令值歲大侵請賑上官不待報而發廩民賴以濟邑有兩沈盤互常鎖其民阻險易爲盜賊致知略用鈔籥法閒他陰伏以相參考往往得其主名眾遂解散而湖渡無警考選南京工科給事中上用人起廢疏極言壬午丙戌以來諸

臣或以忤觸或以註誤放擯如鄒元標趙南星王德完輩皆所謂國之楨幹人之典刑何可不及時予環其他召對勤政之請諫止蘆田之封收撤礦稅之使糾參馮尚寶之姦理學易名之議禁止私鑄之弊蠲租賑饑之告安邊保泰之奏前後凡數十上以親老乞終養不得請抑鬱成疾卒

府志

朱多烜字貞吉弋陽王多煌之弟奉國將軍穎敏絕人善詩歌兼工繪事見古人墨蹟一再臨摹如出其手尺牘小札日可百函語皆有致嘗輕裝出遊變姓名爲來相如遠遊山水蹤迹徧吳楚之間嘗偕吳明卿入吳訪王伯穀於金陵王元美於弇山歸而掩關卻掃以倦遊名其詩晚病羸猶不廢吟誦臨終操筆作帖命子謀揮

以白幘鶴髦殮榘側並鐫勒銘識弟子私諡曰清敏先

生謀暉有父風與鎮國將軍多獎放志文酒終其世明

甯王傳

人物志

謹案南昌顧志有來觀字子魚出

遊三湘

吳越間有集

湯義仍馬之序阿志原案據明史

稱卽謀暉效其父
變名所爲附錄之

朱統鐵字佛大樂安靖莊王裔授封鎮國中尉究心古

文詞賦著有適園詩集而壁齋文集鐵賦性至孝父奉

國將軍謀塏博極羣書當神廟初宗齒日繁祿日匱用

相國李廷機議責令親支檢舉宗弊塏遂訐奏族宗謀

塏以婢產冒濫奉旨削塏爵省祿可萬金嗣王銜之中

塏以奇禍被逮鐵痛父冤叩闕上書奉旨復塏爵秩如

初通國稱鐵爲純孝子議汕議沌俱明經議汴癸未進

士人物志

汪應叟字漢章新建人少負雋才萬厯鄉舉公車不第益好爲古文辭與相國張洪陽及里中耆宿爲匡山社龍光社逃禪寄酒徜徉山水閒以二親年高就浮梁教諭壬戌以母艱歸里結廬墓左未及服闋病卒所著有隸事評及栖約齋玉毫庵黃山雲居天都諸遊草人物志樂繼同字于埜新建人萬厯鄉舉初授湖廣通城縣教諭升榮縣知縣值番酋倡亂郡邑望風解紐繼同慷慨請纓卒蕩平之升岳州府丞時久雨水漲膏壤淪沒繼同竭誠拜禱歲以有秋用薦擢本府知府請告歸卒府志唐大章字伯和豐城人萬厯進士由庶常進編修厯南祭酒會逆璫魏忠賢亂政有請建逆祠於國學旁者大章發憤抗言力持不可議遂寢竟以此忤璫意奪職崇

禎戊辰起南禮侍尋轉吏侍擢禮部尚書教習庶吉士纂修神宗熹宗實錄旋充經筵講官改南禮部尚書卒於家年八十遣官祭葬贈太子少保入祀鄉賢祠輿論允慨請老後有六子三十六孫爲一時所未有文集若

干卷藏於家

人物志

饒伸字抑之進賢人萬厯進士授工部主事十六年底子黃洪憲典順天試大學士王錫爵子衡爲舉首申時行壻李鴻亦預選禮部主事于孔兼疑舉人屠大壯及鴻有私郎中高桂遂摘可疑者八人并及衡衡實有才名錫爵大憤疏辯與時行並乞罷帝慰留之命禮部覆試侍郎于慎行以大壯文獨劣擬乙置都御史吳時來不可桂力爭乃如慎行議列甲乙以上時行錫爵調旨

盡留之且奪桂俸二月伸乃抗疏劾時來附權蔑紀請與錫爵洪憲俱賜罷錫爵時行杜門求去帝仍慰留而下伸詔獄給事胡汝甯等復劾伸及桂以媚執政削伸籍桂貶三秩調邊方伸既斥朝士多咎錫爵錫爵不自安屢請敘用起伸南工部主事改南吏部引疾歸天啟初起南光祿少卿累官刑部侍郎魏忠賢亂政請告歸所輯學海六百餘卷時稱其浩博兄位字廷立累官工部侍郎母劉年百歲與伸先後以侍養歸一時以爲榮

明史
白志

喻三元字少極豐城人萬厯中知平涼府沈毅廉靜勇於任事初至郡盜賊犯靜固悉心防禦頒布保障條約遠邇戒嚴居民恃以無恐首禁宗藩請託諭令修禮義

以重廉隅條議獎賢宗以勵不肖宗姓悉斂避不敢犯
創行條鞭以蘇民困裁冗費冗役當事者或稱不便三
元謂裁省非立異取怨以要譽當官如理家視有無爲
豐嗇食人食者分人事止知封殖視民若路人如朝廷
官人之意何一時臺省監司咸重之斷疑獄懲豪橫免
贖鍰崇禮讓卽漢循良無多讓者

陝西通志

饒景曜字廷獻進賢人萬厯進士筮仕刑部會鑛稅中
使四出多以抗旨劾奏守令輒逮治景曜讞決多所匡
持厯官河南少參浙東分巡所至有聲尋改督兩浙學
政備兵金衢時值鑛賊竊發設方略禽渠領撫按上其
功晉河北參政旋升浙江按察使轉四川右布政使未
任而卒宦囊蕭然豫章論清操以爲最

人物志

羅朝國字維楨新建人萬厯進士授青浦知縣泖湖水衝蕩廬舍禾稼捐貲築隄勸農課士弭盜止訟以治最行取銓部歷尚寶卿通政使晉操江副都御史所建暨悉關安危至計其最著者如皖城立操廠練水師申明沿江防禦之法特拔技勇潘可大題授中權後勦流寇死難晉南京工部侍郎旋擢刑部尚書歸里門雍容論學講義一夕無疾而逝贈少保予祭葬如例

縣志